

U catucciu di zia Maria

- Mì, mì, mì ! issu stralappiatu di Peppinu! Induve andarà cù sta vanga torta è rughjinosa?
- Pè pone i pomi, u cunnosci, hà da fà un veru tarramotu. D'appressu à mè, cerca sempre un tesoru.
- Dicenu in paese chì, deci anni fà , issu scemu di Peppinu avaria trovu una scatola piena di soldi piattata sott'à una zolla di tarra rossa in lu chjosu di Zia Maria.
- Òn era micca una scatola ma u vechju catucciu di Ghjasippione u so maritu. Finita a guerra, ellu si n'hè mortu, senza mancu spende un soldu è senza di induv'era u piattatoghju.
- S'e capiscu bè, issu stuvigliu , i pinzuti u chjamanu cù e labbre strinte, "le seau hygiénique". Allora, sott'à u cuparchju, ci era un bacinu sanu sanu di pezze in oru.
- Nò, muneta di carta. Pè guadagnà assai o troppu, ci era u mercatu neru in Aiacciu. Eppo i taliani pacavanu sempre cù biglietti francesi di mille franchi. Durante a guerra, cullavanu in paese pè cumprà vitelli, ovi, ghjalline è casgiu pecurinu. Maria, avaria vindutu ancu a camisgia nova di u maritu. U veiculu militare piantava in piazza di a ghjesgia. U tenente suvitatu da dui suldati lucchesi armati, pichjava à l'uscio di Ghjasippione, ma era a so figliola chì apria. Ella, à vint'anni, forse cercava à maritassi.
- A tinta hè firmata sola. Cerca dinò u maritu ma sò passati l'anni.
- Prima di tuttu, Peppinu piattò u tesoru in casa soia. In paese durante trè mesi, dicia à i so amichi ch'ellu era divintatu riccu, ch'è un ziu americanu li avia lasciatu una fortuna, ch'ellu vulia una donna, una serva, cumprassi un cavallu è una casa grossa cum'è un castellu.
- È allora? Per ellu ùn era tempu di fà qualcosa ?
- Issu scalzacane di Peppinu parlava troppu ma nimu ùn cridia e so chjachjare. Eppo, una matina si n'andò in Bastia cù i so soldi ingutuppati in la musetta. In la prima banca, parlendu u francese, vulia "un compte courant et un chèquier". Ma solu u direttore pudia riceve è salvà una tamanta fortuna.... Ohimè !
- Ma ci pensu, i soldi di a guerra un avianu più valore.
- Ai raghjò ! Peppinu hà giratu tutta a santa ghjurnata in la cità, da una banca à l'altra, circhendu un direttore più astutu, più generosu. Di ritornu in paese, hè andatu à cunfissassi è u prete l'hà mandatu à presentà scuse à Zia Maria.
- Avà aghju capitu tuttu. Hè divintatu tontu persù, è quandu un paisanu hà bisognu di vangà u so chjosu, chjama Peppinu chì senza fassi pagà corre à sbulicà a tarra, cerchendu ogni volta un altru tesoru.....